

2CO

¹ Bulus kwa nal kə dlakulva gyiiya Tləkatəg Yesu də naaga Daadamazhigəla, ard zəraabamiiyam Timoti, da vak dlamakəlaaa lii gata Daadmazhəgəl ma Korinti, əmtəd də yaa daddaha gatəg bədəm ma larda Akaya.

² Herərra ard gabərər vak Daadamazhigəl Daadamiiyama ard Yaazhəgəl Yesu Tləkatəga aa ndzarandzəg əmtəd də kuurama.

Daadamazhigəla dadda taa dzəgwagha

³ Tagiyamartag kə uus kə Daadamazhigəl Daadamiiyama, kwa iin Daada Yaazhəgəl Yesu Tləkatəga, Daada kwa dadda zhəwadal ba dyək dyəka, Daadamazhigəl kwa tagkiyam aandzu hulfa kwar kə dzəgwagha!

⁴ Takkiyamtag nə Daadamazhigəl kə dzəgwagh ma dlada miiyam bədəmma, adaba kəmyam ndakwani kiyam tagtər kə dzəgwagh kə kyalmaha ma dladi kwar huḅəg nə iitəra, də kwanən kə taa dzəgwagha kwa tləyamkəna nə miiyam vak Daadamazhigəla.

⁵ Bandkwa kiyam huḅəg nə miiyam kə dlada huḅu bandkwah nə Tləkatəg də ghəraana kə dlada, kiyam da tləkəna tədvd Tləkatəg kə taa dzəgwagha Daadamazhigəla

⁶ Aandzu ma kiyam huḅa dlada, kiyam huḅəg mbakyarvad nal kə dəga taa dzəgwagh kəskuurama dlaḅa da fəkurna kə ndzəd ma ndzəgana gatəgaruwa. Akwama tagkiyam dzəgwagh nə uuda, ba kuuram ndakwani tlamkənətləg kə taa dzəgwaghiina kwam

da tləkəna nə uuram kə ndzəda fa ərvədmahud də dladə kwa kiyam huḅəg nə miiyamna.

⁷ Kəm maay 6a ndaundau də kuuram aandzu ba hədiikən biya, adaba kəm sərgasəreḡ taakiya am huḅa dladə band kwa kəm huḅəg nəmnda, kuram ndakwani am da tləkənatləḡ kə hulfa taa dzəḡweaghən ḡagəkəmənda nə uuda.

⁸ Kəm naay taaki am dzan kwal sərgasəreḡ təḡhər kə hulfa dladən huḅaməndu nəmnd ma haay Asiya, zaraabahar biya, kwan kə dladə dyəkadyək ba vaivaiya mandki kəm da əmtsaaḡa.

⁹ Baz tlatləḡan kəskəmənd taaki manki shariya əmtsəḡ wa təkəmənda nə uuda. Dzəḡhardzəḡ nə wana haik fadḡhər kəskəmənd tə ḡhramənda, bamma kəm fadḡhər tə Daadamazhigəla, kwa iin wa ciya lii əmtsahara əmtsahəḡa

¹⁰ Sakəməndasəḡ nə Daadamazhigəl sagal ma əmtsəḡa dladə, fəmdəḡhərtfəḡ taakiya da katkəməndkatəḡa, fəmdəḡhərət ba tə iina mbakyarvad ḡwiiya katkəməndətta.

¹¹ Mələmkəməndu mələḡ də dzəḡwazhigəla. Tədvdə kwah war da tagar nə uudah ba dyəka kə uus kə Daadamazhigəl mbakyarvad kəmənda, mbakyarvad bark badyak kwa kəmənda tləkəna nəmnda tədvəd dzəḡwazhigəla.

Gwiighant gwiig nə Bulus kə duula taa uusa

¹² Dəḡiti fəkiiyama kə tsa kusḡhəḡha, adaba dzamaghəramiiyam wa tagkiyamtag taakiya ḡagiyamḡag kə ndzəḡan ba cuwadad ma duniya bad ərvədmahud palla, kyambar ndzəḡani kwa ndzamda nəmnd də kuurama. Ən tagan taakiya ndzəmənda bad jiira hulfa dəḡa Daadamazhigəla,

tədvad herərra Daadamazhigəla, kwakyarvad dyəmdyəməər kwan kə duni biya.

¹³ Kəm viindkur dəgiti am da karantəga karantəg nuurama am nəghaakana, Bakəvakwaha nəghamaka nəghəg ənkyəkwanan ndakwana, mandləg naiya am da nəghəgakanəghəg kə dəgitah badəmma,

¹⁴ Adaba sartən da saay nə Yaazhəgəlamiiyam Yesu, am da tsa kushəg də kəmənd, band kwa kəmənda tsa nəmənd kə kushəg də kuurama.

¹⁵ Mbakyarvad haiyananthaig naiy kwana, iin wa nahan naiy kə sagau da vakaru ba zəngwa, adaba am tləkəna kə bark shig buwa.

¹⁶ Badlanvaɓadləg kə da vakaruwa akwaman da dagal dama Makidoniya, ən da ghacan dlab vakaruwa akwaman da gwiiya saasa, adaba ən tlaran kə dəgiti am da məlgwad nə uurama kiyava langan kəskai dama Yahudiya.

¹⁷ Mam zharəg nə uuram tsa na ɓadlawa ba kwal də sərgasərgar ha kəskuurama? Nii mam zharg nə uuram ɓadlawa də ndzəgana hənkalə uudərha , adaba ən taga taaki, “aana” ən gwiiya tagan dlab taaki “əndkwah bihi”?

¹⁸ Bandkwa maay nə ndaudau biya Daadamazhigəl iin jiira, bandkwah dlab nə əlbugən kəm tagkur nəməndna dəga taaki “Aana” ard “A'a biya.”

¹⁹ Mbakyarvad Zəra Daadamazhigəla Yesu Tləkatəga, wa tagan naiya ard Sila ard Timoti kə əlbəg maraw təghəra, dəga taaki “Aana” ard “Aa” biya, ba kələhənga ba “Aana”.

²⁰ Adaba righant tədvad Yesu nə Daadamazhigəl kə langyi taa nə iin badəmma. Iin wa kiyam tag nə miiyam tədvad Yesu Tləkatəg taaki “Aandz band-

kwaha” kiyava fəgaara kə Daadamazhigəla.

²¹ Ba Daadamazhigəl pal, wa da vəlkiyam tləkəna shifəg ma Tləkatəga, baz kəmnda baz kuurama, ba iin dla6 fakiyamafəga.

²² Fakiyamətfəg kə dəga sərgan tə kəmyam kwa da mara taaki kiyam dəgaana, vəlakiyamvələg dlab kə gyagyaan shəkwan ma ərvīdmahudāmiyyama mbakyarvad markiyamdadan kə dəgiti da 6ag nə iin təvuuka.

²³ Ba Daadamazhigəl nə shidara, akwama fiid wan tag nai taakiya kwa gwiiya na bi nai dagal dama korinti biya, mbakyarvad aa gwiiya fankuraabi kə dlad biya.

²⁴ Kwakyarvad kəm naa markuura ndzəd təghər kə fadghəraru biya, maaya, kiyam 6aa ba tlər əmtada, kiyava hwaɗag kəskuurama, mbakyarvad am ghacan bad ndzəd ma fadghəraruwa.

2

¹ Mbakyarvad kwaha fandəmfəg ma ghərar taaki ən madlai da vakaru ən badzədkurda kə ərvədmahud biya,

² Aitsa, akwama fankuraafəg kə badzəga ərvədmahudā, war wada fəgwa ciinga əmtakər kəskai, akwama maay ban daddakwa ən fəgara naiy kə badzəga ərvədmahud biyi?

³ Kwa viindankura nai kə kwah kə wakiita, adaba iin naiya taakiya akwama danəvdəga ən tlara kə uudahi kwa dlayatər kə fəgwa hwaɗaga, ar da badzəwadan kə ərvədmahud biya. Adaba fandəghərtfəg naiy taakiya, akwama ən da hwaɗaga naiya, badəmmaru ndakwani am da hwaɗaga.

4 Viindankura mbakyarvad ən ma dlada ard badzəga ərvədmahud ba dyəkdyəka, baz kəla yuwa tuug kəskai ba vaivaiya, kwakyarvad ən fəkura kə badzəga ərvədmahud biya, adaba am səran taaki ən waikurwaig ba vaivaiya.

Bəshgarna haip kə daddakwa bagaa haipa

5 Akwama bagabag nə uudan kə dəga saa də badzəga ərvədmahuda, aa baggwi kəskai pal bi nə iini, aa bagkura baz kuuram badəmma. Adaba ən taa kwana naiya kwakyarvad ən mbəkurs biya.

6 Kiiḡa ndaigən aa tləkəna nə uudanən vak dla-makəlaaa, tlatlan bandkwaha.

7 Ndakwan ciya, bəshamarna bəshəga, am farna kə ndzəda, haik duugars duug kəskuuram ma badzəga ərvədmahuda kwa da juugujəg kə ndzədaana.

8 Mbakyarvad kwaha ən ghalakuurama, am marardan taakiya am waigan ba vaivaiya.

9 Na viindkura kwan kə wakiita mbakyarvad ən fəsha kuurama, adaba ən səran mbatak am da gatəgaan kə əlbəgi tagankur ba kəlahənga.

10 Badəm daddakwama bəshgarna nə uurama, ba kai ndakwani bəshanarna bəshəga. Dəgiti na bəshna naiya, akwama ba məng nə dəgiti ənda bəshgarna naiya, bəshənna bəshəg mbakyarvad kuurama, ma barka Tləkatəga,

11 Haik tləkənatləg nə shatanah kə duula valla kəmyama, mbakyarvad kiiyam sərgasərg kə dəga kəladərahan bat ḡalaḡala.

Dəgiti njikən kə Bulus ma Toruwasa

¹² Danal ba nai damma toruwasa da taa əlbəga marawa təghər kə Tləkatəga, wurghuntwurəg dlaḅ nə Yaazhəgəl kə duula ᠖a tlər vaakwana,

¹³ bakəvakwaha ᠖allabi nə ghərar biya, adaba nəghəghanabi kə zəraabar Titus vaakwa nə iin biya. Təhalakwaha kaa duutərasduug kəskai kə uudaha, kaa dagal kəskai damma Makidoniya.

Zaa fiir ma gata Tləkatəga

¹⁴ Aa tagvartag nə uus kə Daadamazhigəla, kwa iin wa ba kəlahəng vəlkiyam zaa fiir tədvaḁ Tləkatəga. Ba tlər də kimyam kiyava langa əlbəg marawa Tləkatəga Aandzu takwara band tərshən bətbəta kwa pəsvapəshəga.

¹⁵ Adaba kiyam band tərshən bətbət nə miiyam kwa vəlgar nə Tləkatəg kə Daadamazhigəla, kwa kwazakwazəg dama lii katavtərətkaṯəga ard lii tə duula əmtsəga.

¹⁶ Kiyava lii tə duula əmtsəga, bətbətna vaka əmtsəga, kwa saa də əmtsəga, kiyava lii tlarkənətləg kə kaṯəga, bətbətna iin shifəga kwa saa də shifəga. Maay daddakwa dzəgwantduug kə ᠖a kwan kə tlər biya.

¹⁷ Adaba kəmnḁa kəm band kyalma uudah biya, kwar taa əlbəg marawa Daadamazhigəl kiyava tləkəna riibatəra. Adaba aa ᠖əlkəmdət nə Daadamazhigəl kəskəmnḁa, kəm taa ba jirjir təvuukwana, kwakyarvad kəm lii ᠖a tləra Tləkatəga.

3

Lii ᠖atləra daala langiya

¹ Aitsa, kəmnḁa fəgarzha gwiya dləba ghəramnd ha nəmnḁa? Nii kəm gata wakita shid da vakaruw ha,

aandzu ma vakaruwa, band kwa ɓag nɔ kyalmah hi?

² Abi ba kuuram dɔ ghɔraru nɔ wakiti kwa kɛm dɔvakai nɛmnda, kwa viindava ma ɔrvidmahudamɛnda adaba nɛghan andzu ba wara dlaɓa karantana.

³ Maramdamarg nɔ uuram taaki am wakita Tlɔkatɛg nɔ uurama, kwa iin nɔ dɛgshɛga tlɔramnda. Kwan kɔ wakita viindava dɔ dɛga viindɛg biya, viindava dɔ shɛdkw cacuwana cacuwana dɛga Daadamazhigɛl kwa dɔ shifɛga. Viindava tɔ fafakɛlama akur biya, viindava ma ɔrvidmahud uudaha.

⁴ Kɛm taa kwana mbakyarvad kɛm dɔ jiir tɔvuukwa Daadamazhigɛl tɔdvad Tlɔkatɛga.

⁵ Maay nɔ dɛgiti kwa kɛm da mardamarg taakiya ɓagamnd dɔ sɛrgasɛrgamnd kɔ tlɔriin biya, Sɛrgasɛrgamɛda saal vak Daadamazhigɛla.

⁶ Iin wa namndal nɛmnd kɔ lii ɓa tlɔra daala langiya kwa viindava tɔdvad adzahadzah biya, viindava tɔdvad shɛdkwa. Adzahadzahɛn kwa viindavana iin wa saa dɔ ɛmtsɛga, shɛdkwa cacuwana iin wa vɛla shifɛga.

⁷ Viindava viindɛg na adzahadzaha muus tɔ fafakɛlama akura, dlaɓa ndanghɔra Daadamazhigɛla mararmarg ma sarta kwa vɛlavdan nɔ iina. Aandzu ba dɛgitɛn ndza mbiig tɔ hudvɛga Muus da zɛlma biya, kaaa mbiig ba caacan hudvɛgaan ba vaivaiya pelatɔrvapelɛg kɔ zarha Isra'ila kɔ vazgaana. Akwama adzahadzahi kwa saa dɔ ɛmtsɛga sɛghɛvsɛg dɔ ndanghɔr ɛndkwana,

⁸ Aitsa, da ɓaga ndar ka cii nɔ dyakɔra ndanghɔra

kwa dēga 6aa tlēra shēdkwa cacuwana- cacuwan kē ndzēgani?

⁹ Akwama ba dēgiti saa dē əmtsēga tlakēnatlōg kē ndanghēra, ba jirjira dēgiti saa dē tlkākēna jira Daadamazhigēla juujig kē iin ba dyakdyaka.

¹⁰ Ba jirjira, ndanghēra umghura langiya madlabi dē ndanghēr ndakwan biya, akwama gēra vanagērēg dē ndanghēra daala langiya.

¹¹ Akwama dēgiti da ghyēnng nē zamanana sēghēvsēg dē ndanghēra, da nēg ndandar ka cii nē dēgiti kwa da ndzēg ba tangw dama zērāzēri!

¹² Mbakyarvad kiiyam mēng dē hulfa kwan kē fantaara, iin wa kiyam mēng dē ndzēd ba vaivaiya.

¹³ Kiiyam maay nē miiyam band Muus biya, kwa hēdgharduu hūdēvēgan dē sēdav biya, haik nēghēganēghēg nē uudaḥa Israilaha kē ghyēnnga ndanghēr kwa da dagal nē zamanana.

¹⁴ Adāba ghērātēra ba dēkdēka, tangw dat hiinanna, mēng nē dēgiti tsētēra nēghēga jiira akwamar karanta umghura langiya. Tēhavdabi nē sēdavēn ba kēvakwan biya, adāba tēhēvdabiya, bamma tēdvad Tlēkatēg kalti lakwti tēhēvdatēhēga.

¹⁵ Tangw dat hiinanna, akwamaar karanta kakadā muusa, kaa hēdtērduhēdēg nē sēdavēn kē ərvēdmahudāatēra.

¹⁶ Tēhvēdatēhēga nē sēdaviina akwama gwiiyag-wiig nē uudan da vak Tlēkatēga.

¹⁷ Aiciiya, Yaazhēgēla iin nē sēdkwa cacuwana-cacuwanna. Vakavaki dē sēdkwa Yaazhēgēla mēng nē kwaraghēr vakwahiina.

¹⁸ Kēmyamēn hēdavarduubi nē hūdēvēgamiiyamēn biya, kiiyam mara paraka ndanghēra Yaazhēgēl band akwatērama, dlaḥa gwiikiyamant gwiig nē

uud kiyam nal band Yaazhægəla. Kwan kə gwiiya vəghən ɓaga kiiyama nə uudəna fəgara bad fəga ma ndanghəra kwa sal vak Yaazhægəla, kwa iin sədkwa caccuwanacaccuwana.

4

Hyahər ma dəfuuwa luuwa

¹ Mbakyarvad kwaha, kiiyam mæng tsuu də kwan kə tləra kwakyarvad zhəwadaala Daadamazhigəla, aa ngadlavbi nə ərvədmahudəmiyam biya.

² Maay lambamnd də shəɓa hulfa dəga muu-niya kwa saa də dəga tsa zhəru biya. Maay lambamnd də valuuda ma taa fiid də əlbəga Daadamazhigəl biya. Kəm taa ba jiir nəmnda bat ɓalaɓala. Da ɓag əndkwah nə uudah kə shiida jiirjiir kwa ɓagamnda nəmnd tə vuuka Daadamazhigəl ma ərvədmaudaana.

³ Akwama əlbəg marawən kwa kəm tag nəmnd kə əlbəg təghərən shəɓashəɓanna, shəɓashəɓan bak lii tə duula əmtsəga.

⁴ Ar lii maay də fadghər nə iitər biya, adaba shatanaha duniya gulfatərətɡulfəg kə ərvədmahudaatəra. Tsatərvatsəg kə nəghəga paraka kwa ba caacan təghər kə iitəra, parakən kwa səghal ma əlbəg marawa aa ndanghəra Tləkatəga, kwa iin nə garava Daadamazhigəla.

⁵ Mbakyarvad kəm taa əlbəg marawa ghəramnd biya, bamma dəga Yesu Tləkatəga, taakiya iin Yaazhægəla, kəm band kwatənaharu nəmnd mbakyarvad Yesu.

⁶ Daadamazhægələn kwa tagaa taaki, “Aa ndzadzəg nə parak ba parakrak ma gurtla,”

iin wa fafæg kə parakan kwa ba parakrak ma ərvədmahudamiiyamma, kiyava ba parakrak kə uudaha mara səran kə ndanghəra Daadamazhigəl təvuukwa Tləkatəga.

⁷ Bakəvakwaha, kəmyamən kiiyam də kwan kə hyahəra ma gatəga, kiiyam band təfuwa luuwa. Niiyamalməg band əndkwaha, ədaba marvədan taakiya ndzədī kwa juujig badəmma sal vak Daadamazhigəla, sal vakamnd biya.

⁸ Vəlkəmənd vələg nə uud kə dlad nə uud aandzu ta kwar kə duula, bakəvakwaha fakəmənda bi nə uud kə kudəg də tləriin biya. Davalitlərna kəm bəgan kə ndaundauwa, ədaba gəndzamdət biya.

⁹ Vəlkəmənd vələg nə uud kə mbahəlla, bakəvakwaha duuwa kəməndarsbi nə Daadamazhigəl biya. Daghuvaliitlər dlaḡa tsəkəməndtsəg nə uud də zaada, bakəvakaha ciibakəməndabi nə uudya.

¹⁰ Ba kəlahənga kəm ba tə duula əmtsəga band kwa ḡagavara kə Yesu, mbakyarvad marvədan nə ndzəgana Yesu tə vəgha miiyam kwa dəga əmtsəga.

¹¹ Ma ba kiiyam ndzəga bad shifəg ma duniya, kiiyam ba tə duula əmtsəg mbakyarvad Yesu, ədaba nəghəvan nə ndzəgana Yesu tə vəghamiiyam kwa dəga əmtsəga.

¹² Iin wa ba kəlahənga kəm ba tə duula əmtsəga, mbakyarvad am tləkəna nə uuram kə shifəga.

¹³ Viindaviindan ma kakada Daadamazhigəl taakiya, “Fandəghərətəga, mbakyarvad kwaha taganataga.” Aandzu ba kiiyam də fadghər hulfa dəgit palla, ba kəmənd ndakwani famdəghərtəga, kəm tag mbakyarvad kwan nəmənd kə ghaiya.

¹⁴ Kəm sərgasərg taakiya Daadamazhigəl kwa ci-

ighant Yaazhægəl Yesu ma gətlaha, da ciikiyamciig əmtad də Yesu, da səkiyamnda da təvuukwana baz kə uurama.

¹⁵ Badəm nə wana mbakyarvad da məlkuuru kəskuurama, adaba herrəra Daadamazhigəla da fəgarabadfəg da təghər kə uudaha ba dyəkka, da nəg kə dəgshəga gwiiya fəgara taa uus kə uudah kə Daadamazhigəla, kiyava vəlva nə ndangəra.

Ndzəgan tədvad fadghəra

¹⁶ Mbakyarvad kwaha gədzamdət biya, aandzu ba vəghamnda dəga uuda duniya da badzəga, bakəvakwaha kəm nəg bak daal ma gatəg ba kəlahənga.

¹⁷ Adaba kwan kə zər dladən kəm huḃəg nəmnda da zəlmabiya, kəm da tləkənatləg kə ndanghər ba dyəkka, kwa juujig kə taga, da ndzəg ba tangw damma zərəzərta.

¹⁸ Kwakyarvad dəgitahi zharəg nə gyiia wa kəm fəg nəmnd kə taad tə vakai biya, bamma dəgitahi kwa nəghvabiya. Adaba dəgitahi kwa nəghəvanəghəga da zəlmabi nə zamanan kə dagal biya, dəgitahi kwa nəghəvabiya dəga tangw damma zərəzərta.

5

¹ Səryamasərg taakiya akwama dlagavnadlag nə tsakwamən kwa kiiyam ndzəga nə miiyama mavakaina, kwa iin nə vəghəghamiiyama dəga kwan kə duniya, ɓagakiymaɓag nə Daadamazhigəl bad ghəran kə hənyah ma ghərazhigəla. Kwan kə hənyaha ndəra nə uud biya, da ndzəg nə iin ba tangw dama zərəzərta.

² Ndakwana, kiiyam fəgaan kə ərvədmahudə, kiiyam hwaɖag ba vaivaiya kiiyam da tləkəna kə səɖav da tə vəgha ma ghərazhigəla.

³ Akwama da vəlyakiiyam vələg nə uud kə səɖava, da tləkiiyamabi nə uud də suuh biya.

⁴ Ma sarta kwa kiiyam ndzəgan nə miiyam də vəgha kwan kə duniya, kiiyam ngiiga mbakyarvad dlaɖa kwa kiiyam huɖəg nə miiyama. Kwak-yarvad kiiyam na tagguva də vəgha kwan kə duni biya, ma naaga miiyama ma kiiyama tləkəna kə səɖav kwa dəga ghərazhigəla, adaba dəgit də shifəga tangw dama zərzzərza gwiighantgwiig kə dəga əmtsəga badəmma.

⁵ Ba Daadamazhigəl də ghəraan wa ɖadləghani kwan kə gwiiya vəgha, vələkiiyamvələg dlaɖ kə shədkwan kiyava markiiyamndan kə dəgiti da ɖagkiiyam nə iin təvuukwa.

⁶ Mbakyarvad kwaha iin wa bakəlahəng kiiyam tsa ərvədmahudə miiyama, kiiyam sərgasərg dlaɖ taakiya akwama ba kiiyam də vəgha kwan kə duniya, kiiyam ba bəkyə də hənyaha miiyam kwa əmtaɖ də Yaazhəgəla.

⁷ Adaba kiiyam ndzəgan ma fadghəra , dəga nəgha gyi biya.

⁸ Bak jiiijira ghacamnda ghacig tsau ba tankara, maa tə naagamnda makəma tagguva də kwan kə vəgha, kəm ndzan əmtaɖ də Yaazhəgəl ma ghərazhigəla.

⁹ Mbakyarvad kwaha, aandzu kəm ma kwan kə duniya aandzu kəm maghərazhəgəla ma tə naagamnd ma ciingu kə əmtakəramnda .

¹⁰ Adaba barari kəskəmyam kiyam ghachaan

təvuukwa Tləkatəga badəmma, kiyava təkitaṁ kə shariya. Ma bawara da caawa dəgshəga tləraani ɓagaa nə iin də vəgha kwan kə duniya, aandzu marawa aandzu marau biya

Badla ndzəgan uudah də Daadamazhigəla

¹¹ Kiiyam sərgasərg tsau kə dəgiti tagav də gədza Daadamazhigəla, iin wa kəm ɓa kələa ndzədāmnda ma kəma sədaa kə kyalmaha. Sərgasəreg nə Daadamazhigəl kə ndzəgana miiyan badəmma, mandlөг naiya am sərgasəreg kə kwan ma ərvədmahudaruwa.

¹² Kwakyarvad kəm dləba ghəramnd təvuukwaru biya, kəm ɓa kəla ndzədāmnda kəm tagkur kə ɗuuli am da ciinggu nə uuram kəmtakəramnd ba vaivaiya, kiyava ngutərangug kəskuuram kə lii naa ghəratər mbakyravad ar uudah dyəkdyəka, dlakulva hənkalatəra.

¹³ Kəm valaagah nəmnd band nkwa taag nə kyalmaha? Aandzun kəm ba valaaga, kəm valaag mbakyarvad ndangəra Daadamazhigəla. Akwama kəm valaag bi nəmnd biya, ba kwa vakaru ci waha.

¹⁴ Badəm nə dəgiti ɓagamnda nəmnda, ɓagamnd kiyava tləkəna dəgshəg kə ghəramnd biya, ɓagamnd mbakyarvad waiyakəva Tləkatəga kwa ɓa tlər də kəmnda. Fəyamdəghərətfəg tsau taakiya əmtsəəmtsəg nə Tləkatəg mbakyarvad uudah badəmma, mbakyarvad kwaha badəm əmtsahara əmtsahəg əmtad də iina.

¹⁵ Əmtsəəmtsəg nə iina mbakyarvad uudah badəmma, adaba haik ɓa dəgiti naag nə ghəratər kə lii də shifəga, bamma ar ɓa ndzəgan mbakyarvad

daddakwa əmtsa kwakyarvad iitəra, ciyavantciig dla6 mbakyarvad iitəra.

16 Mbakyarvad kwaha kəm madlabi zhara ndzəgana uud də hənkala duni biya, aandzu ba tapamndəna tapəg kə dzamaghər təghər kə ndzəgana Tləkatəg band ndzəgana uudəra, ndakwana kəm madlabi ndzamgan əndkwah biya.

17 Mbakyarvad kwaha akwama nzdəgan ma Tləkatəg nə uudana, nalnəg kə daala vərdəga, badəm nə ənghura dəgitaha daal zamanana, aandzu ba auwa, nalnəg kə daala.

18 Badəm nə wana ba vak Daadamazhigəla, kwa badləghani ndzəgana taataka miyam əmtad də iin tədvad Tləatəga, vələkəməndvələg dla6 kə tləra badla ndzəgana taataka uudah də Daadamazhigəla.

19 Əlbəgamnda iin taakiya badləghani badləg nə Daadamazhigəl kə ndzəgana taataka uuda dəgshiga ard iin tədvad Tləkatəga, maay dla6 kədlə haipahatər təghər kə iitər biya. Vələkəməndvələg nə Daadamazhigəl kə dəgshiga 6a tləra badla ndzəgana uudaha ard iina.

20 Mbakyarvadkwaha kəm dlakulva gyiya tləkatəg nəmnda, mandki ba Daadamazhigəl də ghəraan wa taaghai tədvad kəmnda. Ma daaga Tləkatəga, kəm ghaala kuurama badlamvəbadləg də Daadamazhigəla am nal kə tsaghwahaana, lii 6a tləghum də iin biya.

21 Tapghanabi nə Tləkatəg kə 6a haip biya, mbakyarvad kəmyamma nadalnəg nə Daadamazhigəl kə Tləkatəg band dadda haipa. Tədvad kwan kə duul, wa kiyyam da tləkəna kə jiira ma daaga Tləkatəg vak Daadamazhigəla.

6

¹ Ma huɗa tləri ɓagamnd nɛmnd ɛmtad dɔ Daadamazhigɛla, kɛm ghalakuuramɛn tlamkɛnatlɛg kɛ herɛrra Daadamazhɛgɛlna, duuwamarsbi nal ba gyagyan biya.

² Cinngamcing kɛ dɛgiti aa taag nɛ, Daadamazhigɛla, amaa, “Sɛghɛv ban sarta kwa ɓagankur nai kɛ herɛrra, cinngankurana cinnga. Sɛghɛv ba sarta katɛga, mɛlankurumɛlɛga.” Cinngamcinnga! kwan sarta kwam da caaug nɛ uuram kɛ herɛrra Daadamazhigɛla, hiinan nɛ faciya katɛga!

³ Nɛyamalbi kɛ duula mbɛdɛg aandzu kɛ war biya, adaba haika tlɛkɛna duula ghudɛkiiyamas ɛlbɛg tɛghɛr kɛ tlamiiyama.

⁴ Dlakulvakwaha, baɗɛm nɛ dɛgiti kiiym ɓag nɛ miiyama, ɓagyamɓaga mbakyarvad kiiyam mar-dan takiya kiiym lii ɓa tlɛra Daadamazhigɛla. Kiiyam ɓagan dɔ fa ɛrvɛdmahudɛ, ard huɓa dlada, mbahɛlla, ard dlada ndzɛgana.

⁵ Kalakɛmndakakalɛg nɛ uuda, ar ɓɛlkɛmdɛm dama guda bɛrfina, dladɛ ar fakɛmdɛt nɛ uud kɛ vavɛrra ma sarta ciiga hɛnkala, ɓagamndaɓag kɛ tlɛr kwa juujig kɛ ndzɛɗamnda, hɛnamndu bi kɛ haar biya dladɛ famndu bi kɛ kaff biya.

⁶ Tɛɗvad hɛnkalamnd kwa cacuwana, ard sɛrgasɛrgamnda, ard fa ɛrvɛdmahudamnda ard taa jiira, maramnda marɛg taakiya kɛm lii ɓa tlɛra Daadamazhigɛl tɛɗvad shɛdkwa cacuwana cacuwana, ard waiyakɛvamnda ba jiijiira,

⁷ Ard ɛlbɛgamnda kwa ba jiijiira, ard ndzɛɗa Daadamazhigɛla. Kɛm mɛng dɔ jiira kwa iin wa band dɛgdɛva kwa kiiyam hɛkyɛg nɛ miiyam ma

dəva kaffa ard dəva ghyəḅa.

⁸ Fakəmdarafəg nə uuda, dlaḅa vəlakəmdn vələg nə uud kə dlaḅa, dləbakəmdət dləbəg nə uuda, dlaḅa bazdakəmdn badzəg nə uud kə ḁaaga. Nakəmdadalnəg nə uud kə lii taa fiida, bakəvakwaha kəm taa ba jiir nəmnda.

⁹ Mandki sərəkəmdn bi nə uud biya, tambar sərəkəmdsəreḡ nə uuda ba vaivaiya, Mandki kəm ba tə duula əmtsəga, iin wan kwana kəm bad shifəga. Ar vəlkəmdn dlaḅa, bakəvakwaha ciibakəmdnabi nə uudi,

¹⁰ Ma huda dlaḁən vəlakəmdn nə uudna, fakəmdn ba hwaḁaaga. Aandzu ba kəm maay də dəgit biya, bakəvakwaha tlakənətləg nə uudah badyək kə hyahər tədvaḁ kəmdn. Mandki kəm maay aandzu ndau biya, mbats baḁəm nə dəgita ba dəgamnda.

¹¹ Kuuram uudaha Korintiyaha, shəbamndkurvabi aandzu ndauw biya, dlaḅa maramndadamarəḡ nəmnd taakiya kəm waikurwaiga ba vaivaiya.

¹² Au kəmdn wa duuwamndkurars duuga, abi kuuram wa haiyamanbī də kəmdn ma ərvədmahudaru biya.

¹³ Ən taagkur kwan naiya band kwa taagtər nə Daad kə əlbəg kə zarhaana, kuuram ndakwani am markəmdndan kə waiyakəvaruwa.

Haḁambi kə ghər də lii maay gatəḡ biya

¹⁴ Haḁambi kə ghər də uudahi kwar maay gata Yaazhəḡəl biya. Əndzəgandzəḡ nə uuda jiirjir ba lapi də dadda ḁa kəlandərri? Nii auwa dzətərəm paraka ard gurtli?

15 Tsaghwa shatanah nə Tləkatəga? Nii auwa dzətərəm lii gata Yesu ard lii maay gata Yesu biyi?

16 Auwa dzətərəm vəgya Daadamazhigəla ard hənyaha 6a ghəlli? Kəm vəgya Daadamazhigəl nəmd kwa də shifəga. Band kwa tagaa nə Daadamazhigəl taaki, “Ən da ndzəgan əmtəd də iitəra, ən gwaiva miitəra. Ən nal dla6a kə Daadamazhəgəlatərta, ar nal dla6 nə iitər kə uudahara.

17 Mbakyarvad kwaha asamasagal ma lii ar maay gata Yesu biya, wahamzhawahəg kə ghəraru də iitəra, am nə Yaazhəgəla. Hadambi kə ghəraru dəgiti kwa maay cacuwana cacuwan biya, ən da haikurət tədvd kwan naiya am nə Daadamazhigəla.

18 Ən da nəg kə Daadaruwa, kuuram dla6 am nal kə zarhahar ghwalvaha ard ənghwasaha. Am nə Yaazhəgəl kwad ndzəd badəmma.”

7

1 Takiiyamətəg tsau nə uud kə langyiya dəgitahan badəm zaraabahara, mbakyarvad kwaha aandz ba cuwadad nə vəghamiiyama ard ərvidmahudamiiyam haik 6a haip kəskəmyama. Kiiyam nal dla6 ba caccuwanacaccuwana ma gədza Daadamazhigəla.

Hwadag nə Bulus mbakyarvad pəlarapələg nə Korintiyah kə ghəra

2 Haiyamanthaig də kəmənd ma ərvədmahudaruwa. Bagamndarabi kə haip aandzu kə war biya, badzamndardabi dla6 kə ərvidmahud aandzu kə war biya, dla6a zamndubi aandzu dəga war biya.

³ Na fækura haip naiya kwakyarvad na tagda kwah biya, band kwa taggankurda naiy taakiya, maay nē dēgiti da tagkuratagw dē waiyakəvəmənd biya, aandzu kəm əmtsəəmtsana aandzu kəm dē shifəga.

⁴ Haiyankurəthaig ba vaivaiya, ən tsa kushəgh dla6 dē kuurama. Ərvidmahudāra ba panah-nah ba vaivaiya. Aandzu ba kəm hu6a dla6a, ərvədmahudāra ba dzaiya.

⁵ Aandzu ba sarti damdaghan nəmənd damma haaya Makidoniya, diiyamndubi kē kudəgg biya. Aandzu kəm takwara ba dla6a, tē 6ala6ala ndakwani pəkya ghaiyamnd nē uuda, ma huda kəssa gəgzətəgdəzəg nē ərvədmahudāmnda.

⁶ Daadamazhəgəli kwa fəgara ndzəd kē dad-dakwa gədzəga, fakəməndafəg kē nzdəd dē sagauwa Titusa.

⁷ Kwakyarvad sagauwa Titus kalti bi wa fakəmənda hwa6ag biya, əlbəgahi tagakəmənd nē iin kē duula kwa famarna nē uuram kē ndzədā. Tagakəməndtag dla6 kē ɖuuli am na nəghəkwa nē uurama ba vaivaiya, ard ɖuuli badzamdadda nē uuram təghər kē dēgiti dzəghardzəga, ard kwa 6agam nē uuram kē kəla ndzədaru kē tlahəgus əlga. Kwan wa fəghwa kē cinnga əmtakər ba vaivaiya.

⁸ Aandzu ba badzakurdabadzəg nē wakiitar kē ərvədmahudā, njikwa biya. Ndza badzanda badzəg kē ərvədmahudā ma sartakwa ndza wura adaba səranasərəg taaki ndza tapghant tapəg nē wakiitar kē ərvədmahudaruwa, aandzu ba dēga sart ənkyəkwaaha.

⁹ Ndakwana ən hwa6aaga , aandzu ba

cənnənganubi kəmtakəra kwa badzankurdanai kə ərvədmahud biya, adaba badzəga ərvədmahudaru wa fakura pəlla ghəra am bədləna kə hənkaləruwa. Badzəga ərvədmahudaruwa hulfa kwa naag nə Daadamazhigəla, mbakyarvad kwaha bəgamndkurabi kə haip təghər kə dəgiti bəgamndkura nəmnd biya.

¹⁰ Adaba badzəga ərvədmahudī kwa hulfa dəga Daadamazhigəla wa fəgaraa pəlaghər kə uuda, gwi-yan davak Daadamazhigəla, da tləkəna əndkwah kə katəga. Dləba maay nə taaki “ma səranasərg” mavakai biya. Adaba badzəga ərvədmahudī səgarda nə uudan kə ghəraana , saa də əmtsəga.

¹¹ Zharamzharəg kə dəgiti aa səkurda nə badzəga ərvədmahud hulfa kwa naag Daadamazhigəl dama kuurama. Fakuraafəg kə panahnaha bəgana, ard mara taaki bəgama bi kə dəgit kalkal biya. Fakuurafəg kə nguda ərvədmahudā, dləba gədzamətəgədzəga. Fakuraafəg kə bə fantara, dləba bəgama bəg kə tləra. Fakuraafəg am bədləvan da caauwa kii bə ndaiga kwa kalkalana. Əlbəg təghər kə kwan kə dəgita, bak jiijiira aandzu tə kwar kə duula maramdamərg nə uuram taakiya am maay də haip biya.

¹² Ma sarta kwa viindananai kə kwah kə wakita, ndza maay lambar də uudi kwa bəga haip biya, aandzu ma daddakwa bəgəvara nə haipa. Dlakulvan wana viindkuranai kiyava markurdan ba da palla pal taaakiya sərgasərg nə Daadamazhigəl haiyamanthaig də kəmda ba vaivaiya.

¹³ Kwakyarvad kwan wa tlamkəna nəmnd kə ndzəd ma ərvədmahudamnda. Maay ba nə tləkəna ndzəd ma ərvədmahudamnd biya, bəbəkwaha

kəm fəgara ba hwaɗag ba vaivaiya aɗaba hulfa hwaɗagən mavakai nə Titus na, mbakyarvad baɗəmmaruwa məlamarumələg də tləkəna ndzəd ma əlbəgaha.

¹⁴ Aandzu ba taganartag nai taakiya ən tsa kushəg də kuurama, da nəmbi damma zhəru biya. Band kwa tagamndkurnəmnd kə dəgitah baɗəm bak jiijiira, bandkwah dlaɓ tsa kushəghamnd də kuurama nalnəg bak jiirjiir təvuukwa Titusa.

¹⁵ Waiyakəvən kwa ɓagkur nə Titus na, fəgara bad fəg ba vaivaiya akwama dzaɓghanadzaməg kwa famaara nə uuram nə uuram baɗəmma, ard hulf həkali maramarda nə uuram ma sarta kwa caawama nə uurama.

¹⁶ Ən hwaɗag ndakwana mbakyarvad haiyananthaig də kuurama bak jiirjiira.

8

Dəgiti vələda nə yaa daddaha gatəga

¹ Ndakwan ci Zaraabaharra, kəm naagan am səran kə dəgiti ɓagaa nə herərra Daadamazhigəl ma dlamakələaaa lii gatəga kwar ma makidoniya.

² Aɗaba huɓaruuhuɓəg kə dlad ba vaivai mbakyarvad dladən darəm nə iitər da mavakaina, bakəvakwaha dyəkəra hwadaagatəra fatərafəg kə ɓa tləra herərra kə məltəru kə kyalmaha, aandzu ar bamma talagəraatəra.

³ Fandəghərtfəg nai taakiya araa vəlda ba kalkala ndzəɗaatəra juujig kwa nahava. Vələdavələg bad haiga ghəratəra, favtəra də ndzəd biya.

⁴ Ghalarkəmnd ghaləga ma kəma vəltər kə duula ɓa tləra məltəru kə uudaha, aɗaba iitər ndakwani

mara dēm damma lii mēltēru kē lii gatēga kwar ghyēba Yahuda.

⁵ Vēlardavēlēg juujig ba kē dēgiti tlatlamnd nēmnda. Adaba vēlardavēlēg kē ghēratēr ba ma zungwēr kē Yaazhēgēla, ar vēldan dila kē ghēraatēr kēskēmnda, band kwa naag nē Daadamazhigēla.

⁶ Nēghamnda ba nēmnd ēndkwaha, kaa ghala Titus kēskēmnd ma zaavuuk dē tlēra dzaha dēgitahi ndzahavanta, adaba iin wa fēghazhafēga.

⁷ Aandzu bamma kwar kē dēgita, ba kuuram wa tēvuukwa, aandzu tē fadghēr ma Tlēkatēga, aandzu ba tē taa ēlbēga, ma sērga dēga jīrjīira, ma tē na ēa tlra, ard waiyakēvēri am ēagkēmnd nē uurama. Mbakyarvad kwaha zamzēg kē vuuk dē ēa tlra vēlēg naaga ghēra.

⁸ Na fēkuraa barari bi naiya, ēn markur dūuli ēagar nē kyalmah kē tlēra mēlagaru kē uudaha. Kwan wa da marda waiyakēvi am dē vakai nē uurama.

⁹ Adaba am sērgasērēg kē herērra Yaazhēgēl Yesu Tlēkatēga. Aandzu ba dadda hyahēr nē iina, bakēvakwaha nadalnēg kē ghēraan kē talaga mbakyarvad kē uurama, adaba tēdvad talagērana, am da tlēkēnatlēg nē uuram kē dēgit badēm tēvuukwa Daadamazhigēla.

¹⁰ Sawariyi ēn vēlkurnaiya, ēn taaakiya, ēagaēag kē maraw am ghyēnnēgna kē dēgiti famarzha nē uuram ma viigēn kwa daal na, kwakyarvad vēlamndavēlēg kalti biya, ēndkwah biya, adaba am naagan kē ēagana.

¹¹ Ghyēngamna ghyēng ci kē tlērēn famarzha nē uuram bad ērvēdmahud pallna, ēagamēag ba kēla ndzēdāaruwa.

¹² Akwamam də ərvədmahudə vəlgaana, da ciingan nə Daadamazhigəl kəmtakəra valgaanaruwa, akwama vəlamndavələg kalkala ndzədaaruwa. Naa bi nə Daadamazhigəl kə 6a dəgiti kwa dətbi nə ndzədaaru dat vakaiy biya.

¹³ Kwakyarvad ən veltər kə dəgit tsaftsaf kə kyalmaha, təhalakwaha ən fəkura kə dəgit dəmdəm biya.

¹⁴ Kwakyarvad taguvnan nə tləriin ba kalkal band kwa nahava, məlāmterumələg ba ndkwana adaba am də duula məltərumələga. Kuuram dla6a ar da məlkurumələg ma sarta kwa da maay nə dəgit vakaru biya, iitər dla6a ar da məlkuru, sarti ma da mæng nə dəgit vakatəra. Tədvad kwah wa da ba kalkal nə ndzəgana.

¹⁵ Bandkwa viindaviindan ma kakada Daadamazhigəl taaki, “ Daadakwa dzagant ba dyəka, da jəguubi kə ndzəda biya, Daadakwa dzagant ba ənkyəkwaha, hətsal bi kə iin biya.”

Titusa ard tsaghwahaana

¹⁶ Kəm tagar uus kə Daadamazhigəl kwa fəghara kə Titus kə 6a tləra məlgaru kə uudah, bandkwa naag naiya.

¹⁷ Kwakyarvad ghalgamnd bi wa fəghara kə dagau da vakaru biya, adaba naha ba wur nə iin kə da vakaruwa.

¹⁸ Wa 6əlamndant6ələg baz zəraabamiiyam əmtad də iina, kwa daal nə daagan vaka taa əlbəg maraw kə dlamakələaaa lii gatəg badəmma.

¹⁹ Maay waha ndakwani, kəsghakəkəsəg nə dlamakələaaa lii gata kə iina ma dahadagal əmtad də kəmnda da vaka 6ətləra herərra kwa kəm 6ag

nəmənd mbakyarvad galla Yaazhəgəla, dlaḅa kiyava mardamarəg taakiya kəm mənəg də ərvədmahuda məltəru kə uudaha.

²⁰ Kəm gədza dəgiti da tagav tə kəmənd təghər kə ḡuuli kəmənda tagw nəmənd də dəgitali dzahavant də haiga ghəra.

²¹ Naagamnda kəm ḅaga kə dəgit marawa, kwak-yarvad təvuukwa Yaazhəgəl pall biya, baz təvuukwa uudaha.

²² Bəlamndantḅələg kə zərabamiiyam əmtad də iitəra, kwa shəg ba dyək kəm ba fişəgaana dlaḅa famndəghərtfəg də iin təghər kə dəgitali shah-shaha. Ndawana gwiiya fəgharafəg kə məlkurumələg mbakyarvad haiyakurərhaig də kuurama.

²³ Dzamamnadzaməg taakiya Titusa tsagwa ḅa tlərarra, baz iina baz kaiya kəm ḅa tlər mbakyarvad kuurama. Kyalma zaraabahamiiyami kwar əmtad də iina, ḅəlatərət nə dlamakələaa lii gata Yesu, tləraatəra fəgara ba galaa Tləkatəga.

²⁴ Maramtərdamarəg kə uudaha kə hulfa waiyakəvən ḅagamtəra nə uuramana. Ar da cinngacinng nə dlamakələaa lii gata Yesu kwa ḅəlatərərḅələg kə dəgiti ḅagamtəra nə uurama, kwan wa da martərdamarəg taakiya tsa kushəghamnd də kuurama mbats bak jiriira.

9

Məltəru kə lii gata Yesu

¹ Maay nə tləra viindkur wakıt kəskai təghər kə məltəru kə yaa dadḡa gatəg biya.

² Adaba ən sərgasərəg nai am naagan kə məlgaru kə uuda, baz tsa kushəgh kəskai vak kə uudaha

makidoniya tēghər kwana. Ən tagtərtəg taakiya kə uuram uudaha Akaya ɓadlɓaɓadlɓg bamma viigən kwa dalna. Hulfa fa ndzədən maramnda nə uurama iin wa fatərafɓg kə ghəravatlər kə fa ndzəɗa.

³ Ndakwan ciya, wan ɓɔlgan kə uudahaan zaraabaharra, aɗaba haik kə nəg nə tsa kushəghamənd də kuuram kə dɔga bandza. Ən naagan an ndzan ba ɓadlaɓadlana, band kwa tagankur nai wurra taaki am ndzana.

⁴ Mbakyarvad kwaha akwama da sarəvsɓg əmtaɗ də kyalma lii gatɔga kwar ma Makidoniya, ən naay ar tləkuuran ba kwal dzahgant dɔgit biya. Akwama dzəghardzɔg əndkwana, əm da ciinga zhəruwa mbakyarvad dyakəra tsa kushəghən ən tsɔg nai də kuurama, ba kai pal bi wam da tsɔgwi nə uuram kə zhəru biya, baz kə uurama.

⁵ Mbakyarvad kwaha, maa ɓagaɓag kə maraw ən ghalu kə Zaraabahən mara sɔv saa vakaru lakwti ən da dagau naiya, mbakyarvad mara dzahant kə dɔgitahaan tama nə uuram kə langyi vɔlgaana, aɗaba ma tləvaran dzahadzahana. Kwan wa da mardamarɔg taakiya vɔlamnda bad naaga ghəraruwa, faakuura də ndzəɗ nə uud biya.

⁶ Dzamam-nadzamɔga, daddakwa riiga hulf ənkyəkwha, da tləkəna ba ənkykwah kə dɔgita ma guuha, kiyava daddakwa riiga hulf ba dyəkka, da tləkənatlɔg kə dɔgit ma guuh ba dyəkka.

⁷ Ma bawara aa vɔldavɔlɔg band kwa haigant nə iina, də badzɔga ərvədmahud biya də barari biya, aɗaba naa daddakwa vɔlda bad hud pal nə Daadamazhigəla.

⁸ Da vɔlkurvɔlɔg nə Daadamazhigəl kə bark ba

kwa juujig kə dɛgiti am naag nə uurama, adaba aandzu ba həra am tləkəna kə dɛgiti am naad nə uuram badəmma, baz kwa juujig kwaha, kiyava 6a dɛga herərr kəskuurama.

⁹ Bandkwa viindaviindan ma kakada Daadamazhigəl taakiya, “Vəltərvələg kə dɛgit kə talagaha. Jirjiira aandz ba tangw damma Zərazəra.”

¹⁰ Ba Daadamazhigəl wa vəlga hulfa riig kə dadda riiga, vələr dlab kə dɛg zəga. Mbakyarvad kwaha da vəkurvələg nə Daadamazhigəl kə hulfa riiga, iin dla6 wa da fəgara hulf kə ghubarga. Tədvad kwah wa da fəgara nə iin kə bark təghər kə dɛgiti amaa velda nə uurama də haiga ghəra kiyav 6a dɛga herərra.

¹¹ Aandzu ba hərra da fəkurafəg kə bark ma dɛgiti am da 6ag nə uuram kiyava vəlɡan kəskurama də haiga ghəra ba kəlahənga. Ar da tagar əndkwah nə uudah ba dyək kə uus kə Daadamazhigəl mbakyarvad gyagyaan kwam da vəltər nə uuram tədvad kəmnda.

¹² Adaba tləra herərrən am 6ag nə uuram kiyava pəlla puuta yaa dadda gatəg kalti biya, gwiiya ba fəgaraa tagar uus badyak dyak kə Daadamazhigəla.

¹³ Mbakyarvad tlərahi kwam 6ag nə uurama, ar da galgan nə uudah ba dyəka kə Daadamazhigəl mbakyarvad fəgarafəgaruwa kwa gwiiya təhala kwa caawamanuuram kə əlbəg marawa Tləkatəga, dla6a mbakyarvad kwa mələmtəru nə uuram kə iitəra ard kyalma uudaha badəmma.

¹⁴ Ar da dzəkurdzug nə iitər kə zhəgəla, dla6a ar da dzamkurdzaməməg ma ərvədmahudaatər mbakyarvad herərr kwa juujig kə taga kwa

ɓagakura nə Daadamazhigəla.

¹⁵ Tagiiyamartag kə uus kə Daadamazhigəl mbakyarvad gyagyanən vɛla kiiyam nə iin, gyagyan kwa juujig kə taga.

10

Ngɔdla ghəran nə Bulus təghər kə tlərana

¹ Ba kai Bulus də ghərara , ən ghalakurama, kwa ɗaakwa nə uud, “Daddakwa də hənkala” akwaman əmtad də kuurama, akwama ən maay əmtad də kuuram biya “Ən daddakwa mbəgar kə uuda” ma barka kalaliya ard hənkala Tləkatəga,

² Ən ghalakuurama, famwabi ən mbukurəs akwama da danəvdəg da vakaru biya, adaba ən sərgasərəg ən da mbətərasmbəg kə lii taaki dəgiti kəm ɓag nəmnda, ba dəga duniya.

³ Aandzu ba kəm ɓa ndzəgan ma duniya, ghwavi kəm ɓag nəmnda dəga duni biya.

⁴ Adaba kadlanga ghwavamnda dəga duniya biya, dəga ndzəda Daadamazhigəla. Kəm dlag tədvad iitər nəmnd kə vakavakahi də ndzəda kwa ndzaməg nə tləghumaha kə dəga fiidfiida.

⁵ Kəm zaafir təghər kə lii ɓala gajauwa, kəm dlagan aandzu kwar kə dəgiti da tsəgarva sərğa Daadamazhigəla, kəm gwiidan dlaɓ aandzu hulfa kwar kə dzamaghər da tɔ ɓa kwatənəhərə ard fəgara kə Tləkatəga.

⁶ Badlamvaɓadlɛg nəmnd kəm vɛla kə kiiɓa ndaig kə daddakwa lawaləg kə fəgaara kə Tləkatəga, akwama ba am fəgarafəga.

⁷ Zharamzharəg kə dəgit bat ɓalaɓala! akwama tagaatag nə uudan taaki dəga tləkatəg nə

iina, aa gwiiya dzamæg nə uudanən kə ghəra, da nəghəgakanəghəg nə iin taakiya ba kəmənd ndakwani kəm dəga tləkatəga.

⁸ Aandzu ba mana tsa kushəgh də ndzədən kwa vələkəmənd nə Yaazhəgəl kiyava fəkura ndzəda, kwakyarvad gulkura nə uud biya, ən da dægəmbi dama zhəru mbakyarvad tlərar biya.

⁹ Tlatlambi taaki ən na vəkur tlatlau nai ma wakiitahar biya.

¹⁰ Adaba tagav taakiya, “Wakiitaha Bulusa ba dladladana ard ndzəda, akwama ba iin də ghəran wa vakamiiyama, maay nə iin taaghəi də ndzəd biya, dlaḡa əlbəgahaana tlalbi kə dəgiti biya.”

¹¹ Barari hulfa kwan kə uudaha ar səran taakiya maay nə gərgər ma taataka dəgiti viindamnda nəmənd ma wakiitamnda akwama kəm maay vakwani, ar də dəgiti kəm da ḡag nəmənd akwama kəm əmtad də kuurama.

¹² Kəm war nəməndi! tlamdalbi nəmənd kə gəra ghəramnd də uudahi kwa ma zhərg nə iitəra jarujig aandzu ma bawara. Kwan kə uudaha ar kura ghəraatər də zaraabahatəra, ar na səraakan kə gərgər mataatakatəra, ar dlagaha nūtəra!

¹³ Kəm maay tsa kushəgh kwa juujig kə ndzəd biya, bamma kəm ghachan bat ghala dəgiti aa ghutəkəmənd nə Daadamazhigəla, kwa ndzakiiyamət baz kuurama.

¹⁴ Abi baz kuuram ndakwani am ba ma ghaali kwa ghudgwi nə Daadamazhigəla, mbakyarvad kwaha dzəvanai kə ghala guh kwakyarvad na dəgal da vakaru da taa əlbəg marawa Tləkatəg biya.

¹⁵ Tsa kushəghamnda juubi kwa nahav biya, tapghantbi dlaḡ kə tləra kyalmah biya. Adaba kəm

də fantar taakiya fadghəraruwa da fəgara bad fəga, tədvaḍ kwah nə vaka ɓa tləramnd ma kə uurama fəgara bad fəg ba vaivaiya,

¹⁶ Kəm da taagan kə əlbəg maraw ma kwatlərn kə kəsah kwa təvuukwaruwa, ba kwal gata daag vaka ɓa tləri ɓaga nə uudan tə vakavaki favan nə iin biya.

¹⁷ Bandkwa viindaviindan ma kakada Daadamazhigəl taakiya, “Badəm nə daddakwa tsa kushəgha, aa tsatsəg kə kushəgh də Yaazhəgəla.”

¹⁸ Daddakwa dləba ghəran bi wa haivanthaig də iin biya, bamma daddakwa dləbgant nə Yaazhəgəla.

11

Bulusa ard lii taa əlbəg fidfiida

¹ Am da fa ba ərvədmahud də kaiya, aandzu ba mæng zər dlaghər vakara. Famafəg kə ərvidmahud də kaiya!

² Ən səlga mbakyarvad kuurama, də hulfa səlga waiyakəva kwa ɓag nə Daadamzhəgəl təghər kəskuurama. Am band ghuul cacuwanacacuwān kwa tavara langyi kəsgan kə zhiila ba pal ba nə iina, iin Tləkatəga.

³ Ən gədzəg naiya aa nalbi band kwa dzəghaar də Hauwa, da dzaar də kuuram biya. Valadavaləg nə ghavala bad dyəmdyəmərəana ɓagaɓag kə haipa. Am band kwah nə uurama, nəgalnəg nə dzam-aghəraru kə dəga jiirər biya, tədvaḍ kwaha, am vəldabi kə ghəraru bak jiirjiir kə Tləkatəg biya.

⁴ Adaba am haigant ba wats də lii səgəv da vakaruwa. Haiyamanthaig də əlbəgahi ar tagkur nə iitər təghər kə Yesu, aandzu ba shah də

kwa tsagamndkuuru nēmnda kə əlbəg marawana. Haiyamanthaig dla6 də hulfa shədkwi tagarkur nə iitəra, bakəvakwaha kwan kə shədkwa shidkwa cacuwanacacuwan bi wa caawama nə uur biya. Haiyamanthaig dla6 də hulfa əlbəg marawatəra, aandzu ba shah də kwa caawama nə uuram vakamnda.

⁵Manzharg naiya jarkwarabi nə lii am tagtər nə uuram taaki “Ar dlakulva gyiyah Yesu” də dəgit biya.

⁶Aandzu ba tsaghwad bi nə uud kə taaghai biya, bakəvakwah ən sərgasərag kə dəgita. Maramndkur-damarg nēmd kwan aandzu tə kwar kə dūula.

⁷Tagankuratag nai kə əlbəg marawa Daadamazhigəl ba gyagyana. Nanenanenəg nai kə ghərarra, kiyava fəkuraaran nə uuda. Baganabag kə haip ciya?

⁸Nalnəg mandki na pərdīgu kwa6 vak kyalma dlamakəlaaa lii gatəga kwakyarvad ən ɓakura kə tləra.

⁹Ma sartən ndzan ba əmtad də kuurama, nahanaheg nai kə kwa6a, bakəvakwaha ndavankur biya, adaba sarwadəvsəg nə zaraabahamiyam kwa sarəv ma Makidunkiya kə dəgiti ən naag nai baɗemma. Fankuraabi nai ma sartakwahiin biya, dla6a ən da zaa ba vuukw bandkwana.

¹⁰Kwakarvad jiira Tləkatəga kwa ma kaiya, maay wa tsəkwavatsəg baɗem ma haaya Akaya kə taaki dūuwardug kə tsa kushəgh biya.

¹¹Aujibəg kəskai ən taa kwani? Mbakyarvad ən maay waiyakurami ciya? Sərgasərg nə Daadamazhigəl taaaki ən waikurwaiga.

¹²Ən zaa ba vuuk nai də dūuwa kwa6i kwam da məlgwad nə uurama, mbakyarvad ən tsətərva kə

“Dlakulvaha gyiyi Yesu kwa dyəkdyəkən” kə ɗuula tsa kushəgh taakiya, ar ɓa tlər ba kalkal də kəmnda.

¹³ Hulfa kwan kə uudaha ar dlakulva gyiyi Yesu aa jiirjiir biya, lii ɓa tləra fiida. Ar na ghəraatər band dlakulva gyiyi Tləkatəga.

¹⁴ Dəga jappər biya, adaba shatanah də ghəraan ndakwani naa ghəraan band zərbələg paraka.

¹⁵ Mbakyarvad kwaha, dəga jappər bi akwama nardalnəg nə lii ɓagar tlər kə Shtanah kə ghəraatər band lii ɓa tləra jiirjiira. Təhala ghyənnga duniya ar da cauwa dəgshəgatər ba kalkal də tləraatəra.

Dladī huɓuu nə Bulus ma ɓa Tləraana

¹⁶ Ən gwiiya ba tagan naiya, aa tlatl bi nə uudan taakiya ən dlag biya. Akwmam tlatləgan band kwaha, aciya, haiyamanthaig də kai band dadda dlag, adaba kai ndakwani ən tləkəna kəda tsa kusəgha.

¹⁷ Hulfa tsakushəghən ən tsəg naiyna, kwak-yarvad tagaa nə Yaazhigəl əndkwah biya. A'a, ma kwanən kə əlbəga ən tsakushəgh band dlaaga.

¹⁸ Adaba məng nə lii tsakushəgh band kwa ɓag nə uudaha duniya, ba kai ndakwani ən ɓagan band kwaha.

¹⁹ Am ba dyəmdyəm nə uuram ba vaivaiya, baz hwaɗag kəskuurama am ɓəsha dəgiti ɓagkur nə dlaa-gaha!

²⁰ Adaba ma fakuraafəg nə uud kə ɓa kwatənəhəra, am ba ɓəshəgana, aandzu pərkurva dəga ruuwa, ma markura ndzəɗa, ma ɓalkura mahəpəngw ma hudvəga.

²¹ Ən cinnga zhəruw nai kə taaki mbakyarvad maira ndzəɗamnd wa ɓagamnda bi kə kwana-

haan kə dəgitaḥ biya! Akwama mæng nə daddakwa fa ndzəda tsa kushəgh də dəgiti tlərna, ba kai ndakwana ən fəgaan kə ndzəd bandkwaha. Ən tag band dlag naiy kə ghaiya vakwana!

²² Akwamaa Ibraniyah nə iitəra, kai ndakwani bandkwaha. Akwamar kudəga Ibrahim nə iitəra, ba kai ndalwani bandkwaha. Akwamar Isra ilah nə iitəra, ba kai ndakwani bandkwaha.

²³ Akwama ar lii ɓatləra Tləkatəg nə iitəra, jantərarajig naiya! ən taa ghaiya mandki nanalnəg kə valaaga! abi jantərarajig naiy də tlər ba vaivaiya, danaghadəg damma guda bərfina, huɓanuhuɓəg kə tsəgga ba dyəkdyəka, shəg badyək kəskai kə ngədləga tə duula əmtsəga.

²⁴ Shəg dləɓa kə Yahudah kalkwakaləg də kiiɓ kulhəkərd taar vaslambada.

²⁵ Shəg həkərd kalkwakaləg nə Rumaha də kiiɓa. Tapavnatapəg dlaɓ ɗawalkwadawaləg nə uud da akura shəg palla. Shəg həkərd kə pərayuwa caaɓəg ən bama vakaiya. Tapannatapəg dlaɓ kə hənnga baz vanng bama dəlva, lakwti səkwadasəg nə uuda.

²⁶ Ma dahadagali ɓagan naiya fərtanafərtəg kəmtsəg ma zaagha, dlaɓa fərtanatərtəg kəmtsəg ma dəva gwardaaha. Fərtanafərtəg kəmtsəg ma dəva zaraabahar Yahudaha, dlaɓa fərtanafərtəg ma dəva lii kwar yahudah biya. Fərtanafərtəg kəmtsəg ma kəssah dyəka, fərtanafərtəg kəmtsəg ma təghala, fərtanafərtəg kəmtsəg ma dəlva, fərtanafərtəg dlaɓ kəmtsəg ma dəva zaraabah fiidfiida.

²⁷ ɓaganaɓag kə tləra, tlakwatləg dlada, hənnanubi kə haar maraw biya ,ɓəshanuɓəshəg kə waiya ard andəla. Shəg ba dyəkka ən tləkənabi kə kaff biya, tlakwatləg nə akwəhya, pəlghwavapələg nə sədav ən

da fæg nai biya.

²⁸ Maay ba nə kyalma dəgitahi shah shah biya, ba kəlahənnga ən kəsa dlada faahyəmi tə yaa daddaha gatəg badəmma.

²⁹ Akwama mæng nə daddakwa hətsalhətsəga, mandki kai wa hətsəgalhətsəga, akwama mæng nə daddakwa dəgəm damma haipa, fəgwafəg kə badza ərvədmahud ba vaivaiya.

³⁰ Akwama nalnəg ba jiirjir kəskai tsakushəgha, ən tsakushəgh də dəgitahi kwa mara hətsəgalhətsəgara.

³¹ Sərgasərg nə Daadamazhigəl taaki fiidbi wan tag naiya, kwa iin Daadamazhigəla, dlaḡa Daada Yaazhəgəl Yesu Tləkatəga. Aa ndzandzəg bark təghər kə iina ba tangw damma zərəzəra!

³² Ma sarta kwa ndzan ma Dimashku naiya, faafəg nə gwammna kwa miizhangil kə tləkəsa Aretas kə uuda tuuk kə ghaiya guda kəs dyəkka Dimashku kiyava viiya kaiya.

³³ Sarkwada nə tsaghwahar ma alghwa tə ghəra dəlga kəssiina, ngədlanarva əndkwaha.

12

Dəgitahi margharda Yesu kə Bulus ma sənga

¹ Aandzu ba da maay nə tləran biya, barari kəskai tsakushəgha. Bandkwannən, ən zaavuuk də taa taa əlbəgah təghər kə dəgitahi marghwada nə Yaazhəgəl Yesu Tləkatəg ma sənnga ard ba ghwəm də gyiya.

² Ən sərgasərg kə uuda nə iina kwa viigan kəlawatar uufad hiinanna, kəsavantkəsəg dagat damma ghərazhigəla dəga həkərḡa tədvaḡ ndzəḡa

Tlëkatëga, mbatak ma ndzëgana vëgha, mbatak ma ndzëgana vëgh biya, ën sërga biya, sërga ba në Daadamazhigël palla.

³ Æn ba sërgasërëg dlaë kë uuda në iina, kwa kësavantkësëg dagat damma ghërashigëla dëga hëkërdna, mbatak ba maa ndzëgana vëgh në iina, mbatak ma ndzëgana vëgh biya , ën sërga biya, sërga ba në Daadamazhigël palla.

⁴ Cinnghacinnëg kë kyalma dëgitahi vakwah kwa da tagëvda biya, hulfa kwa tagdabi në uuda dëgshëg kë ëlbëg tëghër biya.

⁵ Æn tsëgan nai kë kushëgh dë uudana, ën tsëgabi kë kushëgh dë ghërar biya, bamma tëghër kë dëgitahi kwa mara hëtsëgalhëtsëgara.

⁶ Akwaman naagan kë tsakushëgha, ën nëgalbi kë dlaagi, adäba ën da taa ba jiiira. Æn maay da tsakushëgh biya, mbakyarvad aa dzambi në uudan mandki ën shah dë kwa sërkwä në iin biya, ard kwa cinngha në iin vakara.

⁷ Adäba haik tsakushëgh kësakai dë kwanahaan dë sënnga kwa juujig kë dëga jappëra, ngal ba bëlgusbëläg në uud kë kuzza kwa nal kë tak ma vëghara. Nalnëg wan kë zërbëlgä shatanah kiyava vëlgwä dlaë tsëkwavan dlaë kë tädä fëdävgha.

⁸ Shëg hëkërd kësakai ën ba ghaala Yaazhëgël mana tagwzha dë kwan kë dëgita,

⁹ Aiyama kësakaiya, “Tlakaratlëg në herërä, adäba tädvad hëtsëgalhëtsëgah wä da nëghëvanëghëg në ndzëdäara.” Mbakyarvad kwaha ën da fëgara bad hwadag nai kë tsakushëgha hëtsëgalhëtsëgar kiyava ndzëg në ndzëdä Tlëkatëg ëmtad dë kaiya.

¹⁰ Mbakyarvad kwaha nëghëghanakanëghëg dë

hətsəgalhətsəgara, ard zaa hətər ma vəga kwa
 ɓaghwi nə uuda, ard huɓa dlada, ard mbahella,
 ard dəgitahi dzaghardzag mbakyarvad Tləkatəga.
 Adaba akwma hətsanəlhətsəga, ən da tləkəna ma
 sartakwah nai kə ndzəda.

*Dəgiti njəkən kə Bulus təghər kə yaa daddaha
 gatəg ma kurinti*

¹¹ Baganabag kə dlagəra, famwaba nə uurama.
 Ma kuuram wa kalkalan kə dləba kaiya. Aandzu
 ba tlanal ndau biya, nal bi taaki “mallaha dlakulva
 gyiya Yesu ruwa” jarkwaraa biya.

¹² Baganabag nə Daadamazhigəl kə dəga sərga ard
 tləraha jappər tədvad kai makuurama, kwa ɓagana
 nai kə tlərar də fa ərvədmahuda. Kwanahan kə
 dəgaha jappəra maradamarəg taakiya ən dlakulva
 gyiya Yesu ba jijjira.

¹³ Ta kwar kə duul wa marandanai taakiya
 namalbi kalkal də kyalma dlamakəlaaa lii gatəg
 biyi? Nii mbakyarvad tsankərvatsəg kə məlgwad də
 kwaɓhi? Bəshamwanaɓəshəg ci kwan kə haipa!

¹⁴ Badlamvaɓadləg kə dəga həkərd da
 nəghakuuram ndakwana. Ən fəkuraabi kə ɓa
 dəgit biya, adaba kuuram wan naag naiya,
 kwaɓaruu biya. Adaba kalkalnabi kə zarh kə
 dlada ɓa dəgit kə Daddaatərtə ard Babbaatər biya,
 bamma Daddaatəra ard Babbaatər wa kəsə dlada
 zarhahatəra.

¹⁵ Ən cənngan əmtakər akwama tsanatsəg kə
 dəgit vakar badəmma, baz ghərarra kwakyarvad ən
 məkuruwa. Akwamma ən zaa ba vuukw də waiya
 kə uurama, mbats am da gulgan kə waiyakəvaru
 mbakyarvad kaiya?

¹⁶ Am da haiganthaig dē kai taakiya nanaibi naiy kē dēgit kēskuuram biya . Adaba mēng wa da tagan taaki na markura dyēmdyēmēra, na patkuru bad fiida.

¹⁷ Zankuruzēg nai tēdvad kwatlēr kē uud ma lii bēlantēr nai da vaakaruwa?

¹⁸ Ghalanghalēg kē Titus ma dēvakaruwa, bēlanantbēlēg kē zēraab kwa dadda gatēg ēmtad dē iina. Am tagan taakiya zakuruzēg nē Titusa? Mbats kaiya ard iina ba dēgit pall nēmnd biya? Dlaḅa kēm taa ba dūul pal biya?

¹⁹ Mbats tlatlam ba wur nē uuranm taakiya kēm ḅa kēla ndzēdamnd kē ngēdla ghēramnd vakaruwa. Ba Daadamazhigēl nē shiīdamnda, kēm taa ba jiiir ma Tlēkatēga. Aandzu kēm ḅa bau nēmnda, kuuramēn ēn waikur naiya, ḅagamnd kwakyarvad am tlēkēna kē ndzēda.

²⁰ ēn gēdzēga, mbatak sarti ēn da sagau naiya, ēn tlēkuuran band kwan naag nai biya, dlaḅa am tlēkwa nē uuram band kwam naag nē uuram biya. ēn gēdza aa tlanarai kē ushava, ard sēlga, ghwada hēnkala, ard naa ghēra ard badza daaga, ard amaaha, ard dēkdēka ghēra, ard ciya hēnkala.

²¹ ēn gēdza taakiya akwama da gwiiyanagwiig da vakaruwa, da fēgwafēg nē Daadamazhēgēlar kē cinnga zhēruwa tē vuukwaruwa. ēn gēdza haik badza ērvēdmahud kēskai mbakyarvad uudah ba dyēkka kwa ndzar ḅa ba haip wura, lii pēlarabi kē ghēr vaka ḅa gwaragwar biya, ard ḅa fēḅēra ard gata duula cēnga ēmtakēra dēga tsa zhēruwa.

13

Bēla magiya Bulus dēga mbasuumbasa

¹ Dəga həkərd nə wan kəskai ən ba sagau da nəghkuranəghəga. “Ba jiiira da sərvaka tə shidah buwa ma həkərd nə jiira əlbəga” band kwa viindava ma kakada Daadamazhigəla.

² Dagawar da vakaru kə dəga buwa, bəlanaθələg kə magiya kə lii bəgara haipa ard kyalma uudah bədəmma mara duuwars kə 6a haipa. Aandzu ban maay əmtad də kuuram biya, ən gwiiya gwaigarsgwaig kə hulfa kii6a ndaigən tagankur nai na, adaba akwama gwiiyanagwiig da vakaruwa maay nə daddakwa da ngədləgarwangədləg kə kii6a ndaig biya.

³ Akwama ba am na səran kə jiira taakiya taaghai nə Tləkatəg tədvd kainya, wayam ci nə jirana, hətsalbi nə tləkatəg ma kuuram biya, dlakulvakwaha mara ndzədan ma kuurama.

⁴ Aandzu ba hərtavəthərtəg nə Yesu tədvd mara ndzəda, bəkvəkwaha də shifəg nə iin tədvd ndzəda Daadamazhigəla. Aandzu ba kiyam maira ndzəd nə miyam ma Yesu, bəkvəkwaha kiyam də shifəg ma Yesu tədvd ndzəda Daadamazhigəla mbakyarvad tlərən bəgamnd nəmnd ma kuurama.

⁵ Səramakasərəg ndan kə ghəruwa mbakyarvad am sərakan taakiya am gatəgaan kə Yesu bə jiiira. Səramakasərəg kə kə ndzəgana ruuwa. Mbats am sərgai taakiya Tləkatəg ba ma kuuram biya? Akwama am sərgabiya, nalnəg mbədamambədəg tə duula fəshiga.

⁶ Mantləg naiya am da sərgaakasərəg taakiya hətsamndalbi nəmnd biya.

⁷ Kəm dzəgwəzhəgəl kə Daadamazhigəl taakiya bəgam bi kə dəgiti kwa kalkal biya. Kwayarvad kəm 6a dabariya nədal ghəramnd mandki kənd

wa zamndu fiir biya, mbakyarvad am ɓagan nə uuram kə dɛgiti kalkala, aandzu ar ba da tlatlɛgan nə uudah taaki mandki hɛtsamdalhɛtsɛga.

⁸ Adaba kəm naiy kə dɛgiti maay nə jiir mavakai biya, kəm naa ba dɛga jiira.

⁹ Kəm hwaɗag nɛmnda akwama hɛtsamndalhɛtsɛga, adaba am tlɛkɛna nə uuram kə ndzɛɗa. Dlaɓa kəm dzɛgwazhɛgɛl am nal ba kə uudah jiirjiira.

¹⁰ Iin wa viindankura nai kə kwana aandzu ban maay ɛmtaɗ dɛ kə uuram biya, adaba akwama sanɛvsɛga, aa da nal bi kə barari kɛskai ɛn da vɛlkur kə dlad dɛ mara ndzɛɗɛn kwa vɛlghwa nə Yaazhɛgɛla, ndzɛɗa fɛgaraadɛfɛga, dɛga badzɛg dɛ badzɛg biya.

ɔlbɛga mbasuumbasa

¹¹ Dɛga mbasuumbas ci zaraabahara, da ba daghuvalitlɛrn. Bagamɓag kə kɛla ndzɛɗaaru am nal kə uudah jiirjiira, cɛngamcɛng kə ghalgara, haiyamanthaig dɛ zaraabaharuwa am ndzan ba lapiya. Tɛɗvad kwah wa da ndzɛg nə Daadamazhigɛl kwa waiyuuda ard gabɛrra ɛmtaɗ dɛ kə uurama.

¹² Tagamartag kə uus kə zaraabaharuwa dɛ taa uus bɛrhuga kwa caccuwanacaccuwana.

¹³ Ar tagkur uus nə yaa daddaha gatɛg baɗɛmma.

¹⁴ Aa ndzandzɛg nə herɛrra Yaazhɛgɛlamiiyam Yesu Tlɛkatɛga, ard waiyakɛva Daadamazhigɛla, ard ndzɛgan shɛdkwa caccuwanacaccuwana ɛmtaɗ dɛ kuuram baɗɛmma. Amin.

Glavda NT Portion **Portions of the New Testament in the Glavda language** **of Nigeria**

copyright © 2024 Luke Initiative for Scripture Translation

Language: (Glavda)

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 9 May 2025 from source files dated 10 May 2025

2a8aae58-fd4b-5cef-8aad-aa54853515aa